

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. प्रधानमंत्री नरेंद्र मोदी होर अज्ज राती 8 बजे देश गी संबोधित करडन।
2. भारत नै आखेआ ऐ जे उं'दी लड़ाई आतंकवाद ते ओहदे ढांचे कन्नै ऐ, नां के पाकिस्तानी सेना कन्नै।
3. उपराज्यपाल मनोज सिन्हा होरें बीएसएफ दे बहादुर जवान गी श्रद्धांजलि अर्पित कीती ते पाकिस्तानी गोलीबारी च मारे गेदे जाकिर हुसैन दे परोआर आहलें कन्नै बी कीती मलाटी। मुखमंत्री उमर अब्दुल्ला होरें गोलाबारी प्रभावित पुंछ इलाके दा दौरा लाया ते इलाके च बंकर निर्माण दी जरूरत उप्पर बल दिता।
4. भारत-पाकिस्तान संघर्ष मगरा 32 ब्हाई अड्डें गी अज्ज सिविल जहाज डोआरियें लेई परतिये खोली दिता गेआ ऐ।
5. विराट कोहली होरें टेस्ट क्रिकेट थमां सन्यास लेने दी घोषणा कीती।

<><><><><><>

PM-Meet

प्रधानमंत्री नरेंद्र मोदी होर अज्ज राती 8 बजे राष्ट्र गी संबोधित करडन। श्री मोदी हुंदा एह संबोधन पहलगाम आतंकी हमले परेंत भारत दे आपरेशन सिंदूर बाद होआ'रदा ऐ। इस आतंकी हमले च 25 भारती ते इक्क नेपाली नागरिक मारेआ गेआ हा। भारत नै जवाबी कार्रवाई करदे होई

पाकिस्तान च नेकां आतंकवादी ते फौजी ठकानें गी तबाह करी दिता ते 100 शा बद्द आतंकवादियें गी मारी मकाया। एहदे शा पैहले प्रधानमंत्री नरेंद्र मोदी होरें नमीं दिल्ली च अम्पने आवास पर इक्क उच्ची सतह आहली बैठक दी प्रधानता कीती। बैठक च केंद्री रक्षा मंत्री राजनाथ सिंह, विदेश मंत्री डॉ. एस जयशंकर, राष्ट्रीय सुरक्षा सलाहकार अजीत डोबाल, प्रमुख रक्षा अध्यक्ष अनिल चौहान, त्रोंनं थेआरबंद फौजें दे प्रमुख ते होर दुए आला अफसर शामिल हे।

<><><><><><>

Defence-Briefing

भारतीय फौज दे ब्हाई कारवाइयें सरबंधी महानिदेशक एयर मार्शल ए.के. भारती होरें आखेआ ऐ जे भारत दी लड़ाई आतंकवादियें ते उ'नेगी मदद पुजाने आहले ढांचे कन्नै ऐ नां के पाकिस्तानी सेना कन्न। उनें आखेआ जे दुख आहली गल्ल ऐ जे पाकिस्तानी सेना नै दखलअंदाजी करियें आतंकवादियें दा पक्ख लैता जिस करियें भारतीय बलें गी बी उस्सै चाल्ली दा परता देना पेआ। आपरेशन सिंदूर बारै दिल्ली च मीडिया गी जानकारी दिंदे होई ए.आई.आर. मार्शल भारतीय होरें दस्सेआ जे आपरेशन सिंदूर दौरान भारतीय फौज नै नागरिक ते फौजी ठकानें गी किस चाल्ली घट्ट शा घट्ट नुकसान पुजाया। उनें भारतीय बलें आसेआ स्थापित कीती गेदियां रक्षा प्रणालियें बारै दस्सेआ जिंदे च भारतीय ब्हाई सेना दे अलावा भारतीय फौज ते भारतीय नौसेना शामिल ही। ब्हाई कारवाइयें सरबंधी महानिदेशक ए.के. भारतीय होरें आखेआ जे भारत दियां जंग सरबंधी प्रणालियां ते थेआर समें दी कसौटी पर खरियां उतरियां न।

<><><><><><>

LG-Jammu

उपराज्यपाल मनोज सिन्हा होरें अज्ज जम्मू दे मिश्रीवाला स्थित साहिब बंदगी आश्रम च बनाए गेदे आरजी आसरमें दा दौरा लाया ते बन्ने पारा थमां होआ'रदी गोलीबारी शा प्रभावित परोआरें

कन्नै मलाटी कीती। उपराज्यपाल होरें परोआरें दा हालचाल पुच्छेआ ते उंदी समस्याएं बारै पुच्छेआ। उनें उंदी सुरक्षा यकीनी बनाने लेई भारत सरकार ते केंद्र शासित प्रदेश प्रशासन दी प्रतिबद्धता गी इक बारी परतिये पक्का कीता। उनें आखेआ जे पूरा मुख्य प्रभावित परोआरें कन्नै इकजुट होइये खड़ोते दा ऐ। उनें आखेआ जे साहड़े सशस्त्र बलें हर बारी आतंकवादी गी समर्थन देने आहले पाकिस्तान आसेआ पैदा खतरें दा मूंह तोड़ परता देने दी अपनी क्षमता दा प्रदर्शन कीता ऐ। उनें गलाया जे भारत कदें बी अपनी सम्प्रभुता ते खेतरीय अखंडता कन्नै समझोता नेइ करोग। उपराज्यपाल मनोज सिन्हा होरें बीएसएफ दे बहादुर कांस्टेबल दीपक चिंगाखाम होरें गी श्रद्धांजलि दिती जिनें अपने कर्तव्य दी पालमा करदे होई अपनी जिंदू दा बलिदान देई दिता। उपराज्यपाल होरें परोआर गी प्रशासन तरफा हर मदाद दा यकीन दोआया।



CM-Poonch

जम्मू-कश्मीर दे मुखमंत्रि उमर अब्दुल्ला होरें पुंछ जिले च पाकिस्तानी गोलीबारी कन्नै प्रभावित लोकें कन्नै अज्ज मलाटी लाई। उनें इलाके च बंकर बनाए जाने दी लोड़ पर बल पाया। बुधवार थमां लेइये अजे तगर कुल 27 लोकें दी मौत बन्ने पारा थमां कीते गेदे हमलें च होई ऐ जिंदे चा सब्भनें शा मते पुंछ जिले दे 20 लोक शामिल हे। इन्दे अलावा 50 होर दुए जखमी बी होए न। ध्यानजोग ऐ जे एह हमले भारत आसेआ 22 अप्रैल गी पहलगाम च सैलानियें पर होए दे हमले दे परते च पाकिस्तान ते पाकिस्तान दे नजैज कब्जे आहले जम्मू-कश्मीर 9 आतंकी ठकानें पर आपरेशन सिंदूर चलाए जाने दे किश गै चिरें बाद कीते गेन। पहलगाम आतंकी हमले च 26 लोक मारे गे हे। जनाब अब्दुल्ला होरें अपने सलाहकार नासिर असलम वानी ते एम.एल.ए एजाज जान हुंदे कन्नै पुंछ दा दौरा लाया ते पाकिस्तानी गोलाबारी कन्नै होए दे नुकसान आहले इलाकें दा सर्वे कीता। मुखमंत्रि होरें गोलाबारी च मारे गेदे लोकें दे परोआर आहलें कन्नै टकोहदा करियें

अमरजीत सिंह ते अमरीक सिंह दे परोआर आहलें कन्नै मलाटी लाई ते सौगी परोआरें कन्नै हमदर्दी जतांदे होई अनमुल्ले नुकसान दा बसोस कीता। मकामी लोकें मुखमंत्री होरेंगी जमीनी हालात बारै जानकारी दिती। उनें सुरनकोट दा दौरा लाइयै मकामी लोकें कन्नै गल्ल कीती। उन्दे मंत्री जावेद राणा होरें प्रशासन आसेआ पुट्टी जा'रदी गेंई बारै अवगत करोआया।

<><><><><><>

Jammu-Update

जंदी रातीं जम्मू-कश्मीर च अमन-रमानदारी बनी दी रेई ते कब्जा रेखा सने अंतरराश्ट्री सरहद पर भारती ते पाकिस्तानी सेना बश्कार कोई माड़ी गल्ल नेई होई।

<><><><><><>

Pakistan-Fact Check

केंद्र सरकारै अपनी ताजा जानकारी च पाकिस्तानी फौज दे दावें दा भंडाफोड़ कीता ऐ। दावें च किश भारतीय समाचार चैनलें आसेआ भारतीय ठकानें दे नष्ट होने दी गल्ल मनने दा झूठा आरोप लाया गेआ ऐ। पत्र सूचना कार्यालय पी.आई.बी दी फेक्ट चैक इकाई नै आखेआ ऐ जे पाकिस्तान सबूतें दे तौर पर छेड़छाड़ आहली फुटेज दस्सियै अपने लोकें गी गुमराह करा करदा ऐ। पास्तिन सोशल मीडिया पर झूठे प्रचार दा सहारा लै'रदा ऐ। इस समें हर जानकारी दी सौहगे होइयै जांच करने दी लोड़ ऐ जेकर तुसेंगी शग्बे आहली सामग्री थहोदी ऐ, टकोहदा करियै भारतीय थेआरबंद बलें जां मौजूदा हालात कन्नै सरबंधत कोई होर सूचना लब्बदी ऐ ते तुस पी.बाई.बी फेक्ट चैक इकाई गी सूचित करो। तुस नेई सामग्री गी वट्सऐप नंबर 8799711259 ते ई मेल आई.डी factcheck@pib.gov.in पर सांझी करी सकदे ओ।

<><><><><><>

Airports

भारत ते पाकिस्तान बश्कार संधर्ष विराम परेंत सिविल ज्हाजें ताई आरजी तौरा पर बंद कीते गेदे 32 ब्हाई अड्डें गी तुरत प्रभाव शा खोली दिता गेआ ऐ। एहदे शा पैहले इनें 32 ब्हाई अड्डें गी इस म्हीने दी 15 तरीक तगर सिविल ज्हाज डोआरियें लेई बंद रक्खे गेदा हा। भारतीय एयरपोर्ट अथारिटी नै इक बयानें च यात्रुएं गी सलाह दिती ऐ जे ओह् आपूं सिद्धे एयरलाइनें थमां डोआरी दी स्थिति दी जांच करन ते होर नमीं ताजा जानकारी ताई एयरलाइनें दी वेबसाइटें पर तक्क रक्खन।

<><><><><><>

Highway

जम्मू-श्रीनगर जरनैली शिड़क उप्पर प्रशासन आसेआ रामबन जिले दे मोराग इलाके च शिड़कें थमां मलबा हटाने मगरा अज्ज दपैहरी गड्डियें दी आओजाई परतिये शुरू होई गेआ। सूत्रें मूजब लोहकी गड्डियें दी जम्मू ते श्रीनगर दवें पासेआ आओजाई खोल्ली दिती गेई ऐ। उआं बड्डी गड्डियां, घाटी थमां जम्मू आई सकडन। तोआई, लोकें गी सलाह दिती गेई ऐ जे ओह् पूरी हिदायत कन्नै सफर करन ते रामबन दे ट्रैफिक नियंत्रण इकाई थमां शिड़क दी मौजूदा स्थिति दी जानकारी मगरा गै सफर करन।

<><><><><><>

Virat-Retirement

भारतीय क्रिकेट खडारी विराट कोहली नै टैस्ट क्रिकेट थमां सन्यास लैने दी घोषणा कीती ऐ। विराट कोहली नै अपने 14 बरें दे टैस्ट क्रिकेट जीवन थमां सन्यास लैने दी खबर सोशल मीडिया पर सांझी कीती। कोहली दे इस ऐलान मगरा भारतीय टैस्ट क्रिकेट च इक्क युग दी समाप्ति होई

गेई। विराट नै 46.8-5 प्रतिशत दी औसत कन्नै 123 टैस्ट मैचें च 9 जहार 230 रन बनाए। विराट कोहली, सचिन तेंदुलकर, राहुल द्रविड़ ते सुनील गवास्कर दे बाद भारत लेई सब्बनें शा मते रन बनाने आहले चौथे खडारी न। 2011 च वेस्ट इंडीज खलाफ डेब्यू करने आहले विराट नै 3 सालें परेंत कप्तानी सांभी ते 68 टैस्ट मैचें च भारत दी नुमायंदगी कीती जिंदे चा उनें 40 टैस्ट जिते, 11 ड्र रेह ते शड़ा 17 टैस्ट मैचें च उनेंगी हार दा सामना करना पेआ।

<><><><><><>

ISRO

भारतीय अंतरिक्ष अनुसंधान संगठन-इसरो दे अध्यक्ष वी. नारायण होरें आखेआ ऐ जे देसै दे नागरिकें दी सुरक्षा यकीनी बनाने ताई 10 उपग्रह लगातार कम्म करा करदे न। कल मणिपुर दे इम्फाल च केंद्री कृषि विश्वविद्यालय च केंद्री कृषि विश्वविद्यालय दे 5में दीक्षांत समारोह गी संबोधित करदे होई उनें आखेआ जे देसै दी सुरक्षा यकीनी करने आस्तै असेंगी 7000 किलोमीटर लम्में तटीय क्षेत्र पर तक्क रक्खनी होग। श्री नारायण होरें आखेआ जे भारतीय अंतरिक्ष अनुसंधान संगठन-इसरो उपग्रहें रायं कृषि, चिकित्सा, मौसम सरबंधी जानकारी ते रणनीतिक खेतरें च महत्वें आहलियां सेवां देआ करदा ऐ।

<><><><><><>